

आकाशवाणी जयपुर-अजमेर

दिनांक 28.05.2024

समय: 18.50 बजे

प्रादेशिक समाचार।

- प्रदेश मांय रिकॉर्ड तोड़ गर्मी ऊं जनजीवन बेहाल-चूरु मांय पारो 50 डिग्री ऊं ऊपर तो गंगानगर, पिलानी अर फलौदी मांय 49 डिग्री रे पार व्हयो।
- प्रदेश मांय चिकित्सा महकमो हीट वेव ऊं बचाव अर ईलाज रा ऊंचां थर रा प्रबन्ध कर्या-सगळा अस्पताला मांय नोडल अहलकार नियुक्त।
- लोकसभा अध्यक्ष ओम बिरला कह्यो-17वीं लोकसभा महिला आरक्षण विधेयक समेत केई दूजा ऐतिहासिक कानूनां सारु जाणी जावेला।
अर
- राज्य सरकार पूर्ण बजट ने ले र लोगां ऊं सुझाव मांग्या।

000

संवारां 9-10 बज्यां रे पछे ई पारा मांय तेजी रे कारण घरां रे बारे निकाळनो मुश्किल व्हे रह्यो है। लू रा थपेड़ां ऊं झुळसण महसूस व्हे री है। प्रदेश मांय घणखरी ठौड़ां दिन रो पारो 46 डिग्री अर बत्ती दर्ज व्हे रह्यो है। लू चाळण ऊं हालात और खराब व्हे ग्या है। ई बीचे आज ई लोग झुलसावण वाळी गर्मी ऊं परेशान रह्या। टोंक मांय 12 बज्यां ई पारो 45 डिग्री ने पार कर ग्यो। अलवर मांय वाहन चालकां ने ताबड़ा अर लू ऊं बचावण सारु दोपहरां मांय ट्रैफिक लाईट ने 3 घंटे बंद राखण रो फैसलो करी ज्यो है। पाली मांय आज तापमान 45 डिग्री रे आरे-सारे पूगता ई सड़का माथे पाणी रो छिडकाव करी ज्यो। कोटा मांय न्यारा-न्यारा तबका ने गर्मी ऊं राहत दीरावण सारु प्रशासन केई फैसला लिया है और ब्यौरा म्हाणा खबरनवीस ऊं-

ई बीचे मौसम महकमो आवता 48 घंटा मांय राज्य रा घणकरी ठौड़ां तापमान मांय 2 ऊं 4 डिग्री सेल्सियस री कमी आवण री आस जतायी है। महकमो कह्यो है कि आगुणी राजस्थान मांय 30 मई ऊं जद के आतूणी राजस्थान मांय 31 मई ऊं करडी लू ऊं राहत मिलण री चौखी आस है। वटे ई झुन्झुनू जिला मांय काले करडी लू रो रेड अलर्ट काडी ज्यो है। ईणी तरह राजधानी जयपुर, बूंदी, दौसा, धौलपुर, कोटा सारु करडी लू रो ऑरेंज अलर्ट जारी कर्यो। मौसम महकमो एक नुवो पश्चिमी विक्षोभ रा असर ऊं 31 मई ने राज्य रा उत्तराद हलका मांय कठे-कठे ई मेघगर्जन, आंधी अर हल्की बिरखा री आस जतायी है। राज्य रा आथूणी उत्तरात हलका मांय कठे-कठे ई 1 अर 2 जून ने ई आंधी-मेह रो मौसम रहवण रा आसार है।

चिकित्सा मंत्री गजेन्द्र सिंह खीवसर कह्या है के चिकित्सा अर स्वास्थ्य मेहकमो हीटवेव ऊं बचाव अर ईलाज सारू ऊचा थर रा बन्दोवस्त करी ज्या है। हीटवेव प्रबंधन री मॉनिटरिंग सारू हर अस्पताल मांय एक नोडल अहलकार नियुक्त करी ज्या है। श्री खीवसर आज लगातार दूजे दिन मांय मेहकमां रा आला अहलकारां साथे मीटिंग करी। बणा कह्यो के प्राकृतिक आपदा री ई घड़ी मांय पूरा चिकित्सा तंत्र अलर्ट मोड अर प्रो-एक्टिव एप्रोच रे साथे काम कर ने लोगां ने राहत दे रह्यो है। वणा कह्यो के चिकित्सा बन्दोवस्ता ने ले र कोई ई लापरवाही या कमी सामी आवण आवे है तो ऊण अस्पताल रा अधीक्षक री जिम्मेदारी तय करी जायेला। बैठक मांय चिकित्सा मंत्री बन्दोवस्ता ने दुरुस्त राखण अर लोगां ने मिशन मोड साथे सेवा देवण रा निर्देश दिया। बैठक रे पछे मीडिया साथे बतळ मांय श्री खीवसर कह्यो के हीटवेव री ई बगत मांय लोगां ने राहत दीरावण सारू भेळा कोशिसां री जरूरत है। चिकित्सा मंत्री कह्यो के 28 मई ताई हीट स्ट्रोक ऊं पांच संदिग्ध मौत रा मामला सामी आया है। वणा ओ ई कह्यो के ई मीना मांय लू ऊं जुडी बीमारियां रा बीस हजार ऊं बत्ती मरीज अस्पताला मांय भर्ती व्ह्या है।

जलदाय मंत्री कन्हैया लाल आज जयपुर मांय मेहकमां रा न्यारा-न्यारा दफतरां रो दौरा कर ने इन्तेजामा रो जायजो लियो।

000

प्रदेश कांग्रेस अध्यक्ष गोविंद सिंह डोटासरा आज राजभवन मांय राज्यपाल कलराज मिश्र ऊं मुलाकात करी। राजभवन रे बारे मीडिया ऊं बतळ मांय श्री डोटासरा कह्यो के सरकार चुणावा मांय लाग्योडी है, ऐड़ मांय बणा राज्यपाल ऊं बिजली अर पाणी मुहैया करावण अर लोगां ने राहत दिरावण री अरज करी। श्री डोटासरा कह्यो के वणा फर्जी डिग्री ऊं नौ करियां मांय आवण वाळा लोगां रा मामला री जांच करावण रो ई राज्यपाल ऊं अरज करी है। वणा कह्यो के इण तरह रा लोगां ने नौकरी ऊं निकाळ्या जावणा चाहिजे।

000

प्रदेश मांय जिला रा प्रभारी सचिव आज ऊं आप आप रा जिलां रा दौरा कर रह्या है। ई दौरान पाणी अर बिजली री उपलब्धता अर लू-तापघात अर मौसमी बीमारियां रा ईलाज सारू अस्पतालां मांय करी ज्या इन्तजामां री समीक्षा करी जावे।

प्रभारी सचिव जिला मांय रात मांय चौपाळ लगावेला अर बटे ई रूकेला। बूंदी रा प्रभारी सचिव कुंजी लाल मीणा जिला कलेक्ट्रेट री न्यारी-न्यारी शाखावां ने देख्या। वणा ई दौरान जिला कलेक्ट्रेट मांय लोगां री समस्यावां सुणी अर अहलकारां ने वां ने बेगी निपटावण रा निर्देश दिया। जयपुर जिला रा प्रभारी अर उर्जा मेहकमां रा अतिरिक्त मुख्य सचिव आलोक गुप्ता बस्सी मांय उप जिला अस्पताल रो औचक निरीक्षण कर्यो। वणा हीट वेव रे चालता बत्ती बैड रिजर्व राखण रा हुकम ई दिया।

भीलवाडा जिला रा प्रभारी सचिव नवीन महाजन हरड़ा पंचायत समिति हलका मांय मनरेगा कामा ने देख्या। वणा गुलाबपुरा कस्बा कने विजय गौशाला ने ई देख्या। वणा गौशाला संचालक ने गाया रा चारा, पाणी रा बन्दोवस्त सुधारण रा निर्देश दिया। भरतपुर री जिला प्रभारी सचिव शुचि त्यागी अहलकारां री बैठक ले र जरूरी निर्देश दिया। वणा बिजली पाणी रा बन्दोवस्ता री समीक्षा करी। गर्मी ने देखता बिजली री बिना कटोती सप्लाई देवण

अर लोगां ने पीवण रा पाणी री कमी नी होवे इण सारू बन्दोवस्त करण रा निर्देश दिया । वणा पाणी री कमी वाळी ठौड़ां टेंकरां री मार्फत पीवण रा पाणी री सप्लाई रा निर्देश दिया । इण रे अलावा अस्पतालां मांय साफ-सफाई रे साथै ई गर्मी रे कारण होवण वाळी बीमारी रा मरीजां रो खास ध्यान राखण रा निर्देश दियां । श्रीगंगानगर रा प्रभारी सचिव अर कृषि, उद्यान तथा पंचायतीराज महकमां रा शासन सचिव वैभव गालरिया कह्यो के अहलकार करडी गर्मी ने देखता बिजली, जलदाय अर स्वास्थ्य महकमां बीचे तालमेल राखता लोगां ने राहत देवण ने कह्यो । साफ पीवण रा पाणी री सप्लाई बणायी राखण सारू बिजली री सप्लाई तैय करी जावे।इणी तरह प्रमुख शासन सचिव भवानी सिंह देथा दौसा पूग र अहलकारां साथे मीटिंग करी ।

000

लोकसभा अध्यक्ष ओम बिरला कह्यो है के निवर्तमान 17वीं लोकसभा महिला आरक्षण विधेयक, तीन तलाक उन्मूलन अर भारतीय न्याय संहिता जस्या विधेयकां ने पारित करण रे साथै-साथै आप रा ऐतिहासिक कानूनां सारू जाणी जावेला ।

नुवी दिल्ली मांय आज आकाशवाणी समाचार साथै खास बतळ मांय श्री बिरला आप रा पांच साल रा काम काज ने याद करता कह्यो के अ कानून देश ने आगे लेजावण अर सकारात्मक बदळाव लावेला । वणा ओ ई कह्यो के 17वीं लोकसभा रे दौरान व्ही चर्चा अर बहस साल 2047 ताई विकसित भारत बणावण सारू एक रोड मेप रा रूप मांय काम करेला ।

000

झुंझुनू रा प्राईवेट अस्पताल मांय एक मरीज री किडनी रो गलत ऑपरेशन करण रा मामला मांय राज्य सरकार अस्पताल रो क्लिनिकल एस्टेब्लिशमेंट रजिस्ट्रेशन निरस्त कर दियो है साथै ई न्यारी-न्यारी राजकीय स्वास्थ्य योजनावां मांय अस्पताल रा एम्पेनलमेंट ने निरस्त करण री कार्यवाही ई सरू कर दी है । चिकित्सा अर स्वास्थ्य मेहकमां री अतिरिक्त मुख्य सचिव शुभ्रा सिंह बतायो के झुंझुनू रा प्राईवेट अस्पताल मांय एक महिला रोगी री दाई किडनी री ठौड़ बाई किडनी काढ देवण रो चिंता जोग मामलो सामी आयो हो । चिकित्सा अर स्वास्थ्य महकमो ई मामला ने खास लेवता सफाखाना रे खिलाफ करडी कार्यवाही करी है । श्रीमती सिंह बतायो के अस्पताल ने सीज करण री कार्रवाई री प्रक्रिया चाले । अतिरिक्त मुख्य सचिव बतायो के सुप्रीम कोर्ट री गाइडलाइन मुजब आखा प्रकरण मांय पांच सदस्या वाळी जांच दल बणा र जांच करवाई जावे । जांच रे पछे पुलिस अधीक्षक झुंझुनू कानी ऊं मामला मांय रिपोर्ट दर्ज करायी जावेला ।

000

राज्य सरकार चालता रोकड बरस रा पूरा बजट ने ले र तैयारियां शुरू कर दी है । सरकार जुलाई मांय संभावित पूर्ण बजट सारू लोगा ऊं सुझाव माग्या है । मुख्यमंत्री भजनलाल शर्मा एक सोशल मीडिया पोस्ट मांय कह्यो के राज्य रा रहवासी वित्त मेहकमा री वेबसाइट माथे बजट ने ले र आप रा सुझाव 15 जून ताई दे सके है । वणा लिख्यो है के राज्य रा सम्पूरण विकास मांय लोगां री भागीदारी तैय करण सारू सरकार ने लोगां रा कीमती सुझावां री जरूरत है । ध्यानजोग है के राज्य सरकार 08 फरवरी ने अंतरिम बजट पेश कर्यो हो । अबै 31 जुलाई ऊं पैला विधानसभा मांय पूर्ण बजट पेश कर्यो जावणो है ।

000